



Imibono lehlakaniphile yaMulalo Doyoyo

Arnold Mushwana
Thulisile Shongwe



Lena yindzaba yaMulalo Doyoyo, umsunguli naSosayensi waseNingizimu Afrika.

Basunguli bantfu labacabanga ngentfo lensha, bese bayayakha.

Mulalo usebentisa iSayensi neThekhinoloji kute asungule tintfo letisita bantfu kanye nemvelo.



"Ngifuna kunicocela ngaNjinyela lowaba ngumsunguli lodvumile. Watalelwa esigodzini saseVondwe," Thishela Mary ucala kukhuluma.

"Thishela, ikuphi iVondwe?" kubuta Lulama.


"Isendzaweni yasemakhaya esifundzeni saseLimpopo," kuphendvula Thishela.



"Mulalo Doyoyo watalwa nga-1970. Benikuphi nine nga-1970?" kubuta Thishela Mary.

"Besingekho nga-1970, Thishela," kuphendvula Jack ahleka.

"Mulalo wacala sikolwa Semabanga Laphansi eVondwe nga- 1977," kuchubeka Thishela.




"Nasekafundza esikolweni semabanga laphakeme,
wacala kutsandza sifundvo seSayensi neseBunjinyela,"
kusho Thishela Mary.

"Yini Bunjinyela?" abuta.


"Yisayensi lehlangene neThekhinoloji," kuphendvula
Nkoka.

"Bumayelana nekwentiwa kwemishini, takhiwo, kanye
naletinye tintfo," kuphendvula Kulani.



"Nobabili nicinisile. Bonjinyela bahlela baphindze
bakhe imishini, letinye tintfo kanye netakhiwo.
Basebentisa iSayensi neThekhinoloji," kusho Thishela.

"Nasekacedze sikolwa Semabanga Laphakeme
eMbilwi, Mulalo watfola umfundzate wekuyofundzela
Bunjinyela eNyuvesi yaseKapa," uyachubeka.



"Nasekasenyuvesi, Mulalo wasungula inhangano
lebitwa ngekutsi yi-Temescial.

Leligama limelela kutsi 'iThekhinoloji, imitsi, kanye
nesayensi'.

I-Temescial ikhutsata lusha kutsi lufundzele iSayensi,
iThekhinoloji, Bunjiniyela kanye Netibalo.

Ngekuhamba kwesikhatsi, sitawufundza lokunyenti
ngaloko."



"Nasekatfole siku semfundvo yakhe yekucala, Mulalo waya eMelika. Wafundza waphindze wafundzisa emanyuvesi alapho.

Wafundzisa iSayensi neMetametiksi. Iyini iMetametiksi?" kubuta Thishela Mary.


"Sifundvo setibalo, sekuma kwetintfo nemaphethini," kusho Akani.



"Uphendvule kahle, Akani," kusho Thishela.

Wachubeka nendzaba yakhe.

"Mulalo uneticu tebudokotela. Watfola ticu temfundvo lesezingeni lelisetulu, i-*PhD*. Nasewutfole tona, ubitwa ngadokotela. Unguchwepheshe emkhakheni weBunjinyela."



"Nyalo, ngembikwekutsi ngingicocele ngetintfo letisungulwe nguMulalo, asenginikhumbute ngentfo yekwakha lekutsiwa ngusimende," kusho Thishela.

"Simende unelitje lokutsiwa yi-Limestone futsi usetjentiswa ekwakheni.

Lelitje ligujwa emayini, liyaphihlitwa libe timvutfu bese liyashiswa kuze libe ngusimende."



"Bafundzi, Mulalo wasungula intfo yekwakha
lengakhiwa ngalelitje. Kepha yona yakhiwa
ngemalahle naletinye tintfo letilahlwe etimbonini.

Loku kusho kutsi ungakwati kwenta simende
ngaphandle kwekugubha i-Limestone. Ngekwenta
kanjalo imvelo iyalonndvoloteka."



"Mulalo waphindze wasungula umshini wekwakha titini lokutsiwa yi-Ecocast. Lomshini wonga emanti nagesi. Phela emanti ayindlala!"

"Akukafaneli sishiye timpompi tivuliwe tikhipha emanti," kusho Jack.

"Yebo, sonkhe kufanele siwonge emanti," kuphendvula Lulama.



"Sengitocedzela indzaba yami ngekunicocela ngesidududu lesihamba ngehayidrojini! Lesidududu sibitwa ngekutsi '*Ahifambeni*'. Mulalo wasungula lencola asebenta nalabanye bacwaningi," kusho Thishela.

"Hawu sidududu sehayidrojini, maye vele!" kusho Kulani.

"Ahifambeni! Asihambeni!" kusho Nkoka.



"Yebo! "Asihambeni siyofundzela Bunjinyela sitosungula tintfo letikahle!" kusho Kulani.

"Asisebentise iSayensi kanye neThekhinoloji kuze sicutulule tinkinga futsi sitijabulise!" kusho Nkoka.

"Bengati kutsi itanikhutsata indzaba yaMulalo!" kusho Thishela Mary amoyitela.

—Imibuto

1. Yini lofuna kuyoyifundzela? Yini lekwenta utsandze kuyofundzela loko?
2. Ucabanga kutsi yini leyenta Mulalo watsandza iSayensi neBunjinyela?
3. Fundza lokwengetiwe ngetinhlobonhlobo teBunjinyela.
4. Fundza lokwengetiwe ngeBasunguli betintfo base-Afrika.

—Tincwadzi letikuloluchungechunge

- Andile Mji
- Asnath Mahapa
- Bongani Mayosi
- Charlotte Maxeke
- Mmantsane Moche Diale
- Mulalo Doyoyo
- Tebello Nyokong
- Tshilidzi Marwala

Lendzaba icanjwe yaphindze yabhalwa
ngesiTsonga, njengenceny ephrojekthi
yetintfo tekufundza te-Zenex Ulwazi Lwethu
nga-2020.



Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).



Your attribution should include the following:
Title: Imibono lehlakaniphile yaMulalo Doyoyo
Author/s: Arnold Mushwana
Translator/s: Simangele Khoza
Illustrator/s: Thulisile Shongwe
Assurer/s: Mduduzi Benjie Shongwe
Language: Siswati

© Zenex Foundation - Saide 2023

CC BY includes the following elements:
BY – Credit must be given to the creator

